

**Apeqquteqaat aallaavigalugu oqallisissiatut siunnersuut, qanoq aaqqissuussinikkut nunatsinni inuiaqatigiinni sapinngisamik pitsaanerpaamik meeqqat suli atualinngitsut illoqarfinni nunaqarfinnilu paaqqutarineqarnissamik pisariaqartitsisut ulluunerani paaqqinnittarfinni angerlarsimaffinniluunniit paarineqarnissamik neqeroorfigineqarsinnaanersut pillugu.**

(Inatsisartunut ilaasortaq Hans Enoksen, Partii Naleraq)

### **Akissuteqaat**

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisunut Ilaasortaq)

Naalakkersuisutut siunnersuuteqartumut Hans Enoksen, Partii Naleraq, apeqquummut pingaaruteqartumut pillugu qutsavigaara. Naalakkersuisut anguniagaraat ulluunerani neqeroorutaasartut nunarput tamakkerlugu pitsaanerulersinneqarlutillu ineriartortinneqarnissaat.

Kisitsisit nutaanerpaat 2014-imeersut takutippaat meeqqat utaqqisutut allatsissimasut kommunini sisamaasuni katillugit 416-iusut. Meeqqat 43-t nunaqarfinni najugaqartut utaqqisutut allaqqapput. Kommunikkaarlugillu kisitsisit naatsorsoraanni Qeqqata Kommuniani meeqqat 37-it utaqqisutut allatsissimapput, taakkunangga 34-t illoqarfinni, pingasullu nunaqarfinni. Kommuneqarfik Sermersuumi meeqqat utaqqisutut allatsissimasut 150-iupput, tamarmillu illoqarfinningaanerlutik. Kommune Kujallermi meeqqat utaqqisutut allatsissimasut 52-iupput, taakkunanggalu 46-t illoqarfinniillutik, nunaqarfinnilu arfinillit utaqqisutut allatsissimallutik. Qaasuitsup Kommuniani meeqqat 177-it utaqqisutut allatsissimapput, taakkunanggalu 143-t illoqarfinni utaqqisuullutik, nunaqarfinnilu 34-t utaqqisutut allatsissimallutik.

Soorlu siunnersuuteqartoq Hans Enoksen, Partii Naleqqameersup nalunngikkaa, kommunit akisussaaffigaat meeqqanut suli atualinngitsunut ulluunerani neqeroorutininik pisariaqartinneqartunik peqarnissaa, aamma taakkununnga meeqquerivinnik paaqqinnittarfeqarnissaa.

Naalakkersuisut kommunit suleqatigalugit aallartereerpaat nuna tamakkerlugu ingerlanneqartussamik init meeqqat atualernissaat sioqqullugu aamma meeqqat atuarfianni atorneqartut qanoq pitsaassuseqarnerannik nalilersuisitsineq. Ininik atorneqartunik nalilersuisitsineq taanna suliassaq arfinni tassani nuna tamakkerlugu anguniagassat suliniutissallu pilersaarusiornissaannut tunngavissiissaaq. Meeqqanik ulluunerani paaqqinnittarfeqarnermi init pisariaqartinneqartut annertusineqarnissaannut nunaqarfinni illoqarfinnilu minnerni atorneqartussatut 2014-imut aamma 2015-imut Inatsisartut aningaasanut inatsisaanni ukiumut 10 mio. kr.-t aningaasaliissutaasimapput.

Ulluunerani meeqqanik sullissinermi ikiortinngorniarnermik ilinniartitaaneq alimasissumi atuartitseriaaseq atorlugu ilinniarneqarsinnaasoq december 2014-imi Perorsaanermik

Ilinniarfimmi, Ilulissaniittoq, aallartinneqarpoq. Ilinniarnep taassuma Ilinniartitaanermut Periusissiami Naalakkersuisut anguniagaasa pivisunngortinnissaat tapersissavaa. Tassanilu minnerunngitsumik nunaqarfinni illoqarfinnilu isorliunerusuni ulluunerani neqeroorutaasuni sulisunik ilinniarsimasunik sulisoqarnissaq qulakkiissavaa.

Ilinniartitaanermut, Kultureqarnermut, Ilisimatusarnermut, Ilageeqarnermullu Naalakkersuisoqarfik, kommunit aamma Ilinniartitaanermut Aqutsisoqarfik suleqatigalugit atualernissaq sioqqullugu suliassaqarfimmi paasissutissanik katersillutik aallartippot. Paasissutissat taakkua takutissavaat meeqqat suli atualinngitsut sulisoqarnikkut aaqqissuussivigineqarnerat pissusissamisoornersaq.

Siunnersuuteqartut oqallinnissamut saqqummiussaannut qujavunga Inatsisartullu ima qarluartumik oqallinnissamik kissaappakka.